

15. februar 2016

UPA2016/137

Inatsisartut suleriaasianni § 33 naapertorlugu Naalakkersuisut peqquneqarnissaannik Inatsisartut aalajangiiffigisassaattut siunnersuut matumuuna imaattoq saqqummiuppara.

**Kalaallit Nunaanni inatsilerinermut kandidatinnorniarfimmik pilersitsisoqarsinnaanera pillugu nassuiaammik kingusinnepaammik UPA2017-imi Inatsisartunut saqqummiunneqartussamik Naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasorta, Ineqi Kielsen, Siumut)

**Tungavilersuut:**

Ukiorpangulersuni nunatta naalagaaffinngornissaanik politikikkut sulissuteqarluni ingerlanera nunatsinni naapitassaasimavoq. Tamannalu aamma nunatta oqaluttuarisaanerani nutaajunerusumi eqqartugaasimaqaluni. Alloriarnerpassuit suli tigusiannngilagut. Kisiannili malunnaatilissuarmik nunatsinni naalagaaffinngornissamut, nunarsuarmiooqataasutut inuussagaanni, akisussaaffiit nammaneqartariaqartut oqimaannerit arlalissuit nunatta namminiivilluni aammalu ingerlatsilluaqaluni ingerlappai. Tassunga killissimanermi ilaatigut qiimmattarnissamik pissutissaqarluarpugut, illuatungaattigut immitsinnut aperisariaqalinnginnerpugut? Naak nunatsinni inatsilerinermik ilinniarfik? Naak inatsisinik instituti? Tassami naalagaaffittut patajaatsumik inissisimassagaanni inatsilerituut pikkorissut pisariaqarluinnarput. Nunami maani inatsisit innuttaasut piumasaaannit aammalu nunarsuarmi pituttuisunik isumaqatigiissutinit ataatsimoortumik ilisimasalinnik nunatsinnut naleqqulluurtunik inatsilerituunik nunarput peqartariaqalinnginnerluni?

Nunatsinni inatsisinik ilisimannittut tamarluinnangajammik Danskit inatsilerituungorniartarnerat malillugu ilinniarsimasuusarput, naatsumik oqaatigalugu Danskit tungaviusumik inatsisaannut sikissimasuusarput. Tamannalu ernumaammernarsinnaasarpoq, tassami nunatta ukiorpangortuni naalagaaffittut ingerlalernissaminik sorsuuteqarnermini inatsiserpassuarnik peruserpassuarnillu Danmarkimut tulluarsagaasunik tigusiannarluni atuutitsisarsimanera takussutissaareerpoq qanoq nunatsinnut danskit inatsisaat periusaalluunniimmi ilaatigut akimmisaarfinngortitsisinnaasarneri oqimaqisut.

Taamatuttaaq Inatsilerinermik aammalu inatsiseqarnermik instituteqalertuugutta inatsisit qalerii-aarlutik ullumikkut inissisimasut aammalu pingaartumik kommuneni sulisunit sulilluarniarlutik akimmisaartitsisaqisut institutip ersarissumik inissisussagalarpai. Inatsisit atuuttut akerleriit ilaatigut naammattoorneqarsinnaasarput tamakkulu institutip taamatut pisoqanginnissaanik pinngitsoortitsisussatut inissisimanissaa siunnerfigineqarsinnaavoq.

Institutimittaaq nunatta tunngaviusumik inatsiseriligassaanik siunnersuusiornissamik suliakkiinissaq pissusissamisoorutut isigineqarsinnaavoq. Tassa Insituti tassaassaaq inatsisilerinermut aammalu inatsisinik atuuttunik atuussimasunillu toqqorsiviullunilu ilisimasaasiviusoq.

Instituteqalernerimi angusat ilagisussanngussavaat nunatsinni inatsisilerituunngorniarsinnaanerup ammaannissaa. Tassa nunatsinnut inatsisit atortitaasut toqqammavigalugit ilinniarsinnaalernissaq.

Taamatuttaaq Institutip akisussaaffinnik tigusinissanut assigiinngitsunut piareersaasarsinnaanissaa siunnerfiusinnaavoq, familieret, arveret allarpassuillu institutimi nunatsinnut naleqqussarlugit suliarineqarsinnaanissaat siunertaasussaalluni.

Taava apererusunnarsivoq, qanoq sivilutigusumik Institutip ingerlalnissaanut piffissaq atorneqassava? Tamanna akissutissarsiniarlugu naalakkersuisut piffissamik aammalu aningaasartuutissanik missiliussanik suliaqarnissaannik inatsisartut naalakkersuisunut inatsissapput. Naalakkersuisut upernaakkut ataatsimiinnermi 2017-imi kingusinnerpaamik saqqummiussinissaat siunnersuutip qulequtaani ilaatinneqassasoq kissaatigaara. Taamaasilluni periusissamik tigussaasumik inatsisartut aalajangernissaminut toqqammavissaqalissammata.

Tassami nunatta unneqarissumik ingerlanissamini inatsisit tamanut sinaakkusiisussat pisariartippai. Taamaattumik qulequttap ataatsimoorfiginissaa pingaaruteqarluinnarpoq. Soorunalumi naapiffiusussat naapiffiujumaarput.

**Pisortanut aningaasaqarnikkut allaffissornikkullu kingunerisassai:**

Siunnersuut piviusunngussappat nassuiaasiortoqartariaqarpoq. Allaffissornermi nukinnut atorneqartussanut immikkoortinneqartussat inuup ataatsip AC-ukiumi ataatsimi akissarsiaanut missigiunneqarput 500.000,00 kr. ilanngutereerlugit nutserinissaq, tusarniaanissaq, nunat allat suleqatigineqarsinnaasut pillugit misissueqqissaarnissaq.

**Inuussutissarsiornermut aningaasaqarnikkut allaffissornikkullu kingunerisassai:**

Soqanngilaq

**Innuttaasunut aningaasaqarnikkut allaffissornikkullu kingunerisassai:**

Soqanngilaq